

Voorwoord

'n Persoonlike woord vir jou

Liewe kategeet

Dit is 'n besondere voorreg om by die kategeese van ons kindertjies betrokke te wees en so mee te help aan hul geestelike vorming. Op hierdie manier kan jy daartoe bydra dat hulle verstaan wat dit beteken om kinders van God te wees en dit met oorgawe gaan leef.

Op hierdie ouderdom is die verhaalelement noodsaaklik en wil die kinders speel-speel leer. Hulle verstaan simboliek nog glad nie, maar fantasie is belangrik. Daarom het ons die lesse so probeer kies dat die verhaalelement telkens teenwoordig is en dat die aktiwiteite opvoedkundig maar ook lekker is.

Om jou as kategeet te help, is die agtergrondinligting in die meeste gevalle reeds in die een of ander verhaalvorm gegiet wat net so gebruik kan word. Hulle wil stories hoor, so kom ons vertel vir hulle stories, maar stories wat hulle vorm in die geloof en hul Bybelkennis laat toeneem. Jy kan die stories dus net so gebruik, of dit aanwend soos wat dit vir jou goed is.

Die kern van hierdie groep se lesse is die boodskap dat God hulle liefhet. Dit gee geborgenheid en sekuriteit en is 'n stewige fondament vir verdere geloofsgroei.

Mag hierdie jaar 'n reis wees waarin jy die geloofspad en horisonne van die Bybel aan jou jong medereisigers uitwys. Mag dit 'n heerlike avontuur wees wat hulle altyd sal onthou. Mag hulle baie leer en seker wees van God se liefde vir hulle.

Ds Chris le Roux
Hoofsamsteller

'n Paar gedagtes van die hoofredakteur

'n Baie groot voorreg het jou te beurt geval. Dit is om klein kindertjies se geloof in die Here te help bou. Die Heilige Gees wil jou vir hierdie grootse taak gebruik. Jy is daar om kinders bewus te maak van God se liefde. Dit moet hulle só vertrou en bemoedig dat hulle met oorgawe hul lewens aan die Here wil wy. Die Here gebruik jou om van sy liefde te vertel, maar ook om dit uit te deel.

Onthou, ons is maar net skakels, net instrumente wat God gebruik om sy wonderlike werk te doen. Daarom kan jy nie hierdie werk doen sonder om te bid nie. Hy roep jou, Hy maak jou bekwaam, Hy rus jou toe. Hy gee jou die gesag. Hou jou persoonlike verhouding met Hom in stand. Bid gereeld.

Geniet dit om vir die Here en sy kinders te lewe.

Dr Hannes Beukes
Hoofredakteur

So werk die kategese

Elke les in hierdie boek is vir jou gerief volledig uitgewerk. Tog is dit belangrik dat jy elke les deeglik by die huis sal voorberei. Party weke sal jy hulpmiddels en klaswerkstukke moet maak.

Alle lesse is presies dieselfde saamgestel. Bly ter wille van eenvormigheid en roetine daarby. Dit wat bekend is, laat jou en die kinders tuis voel. En wat uiters belangrik is: Die primêre doel van kategese is om dié persoonlike verhouding wat God met sy kinders kom vestig het, uit te brei en te versterk binne die huisgesin en die gemeente.

Om hierdie persoonlike verhouding in stand te hou, is die Bybel onontbeerlik, daarom moet dit in elke klas gebruik word. Laat die kinders sien die Bybel word gebruik, al lees jy nie die verhaal of teks elke keer direk daaruit nie. Plak byvoorbeeld deur die loop van die jaar plakkertjies by die tekste wat gebruik word om aan die einde van die jaar te kan sien hoeveel keer julle die Bybel gebruik het.

Wat registerhouding betref, bly elke gemeente by die reëls wat in hul gemeente geld.

Hierdie kategesehandleiding is so saamgestel dat elke les dieselfde struktuur volg. Met die gedeelte MEER INLIGTING word jy begelei om 'n redelike agtergrond te kry oor dit wat in die les aangebied word. Feite uit MEER INLIGTING word saamgevat in IETS BELANGRIK sodat die kern van die les ingeskerp kan word.

Die kategesereeks waarvan hierdie boek deel is, werk op die volgende basis: Daar bestaan drie fasegroepe van graad R tot by graad 10. Grade R tot 3 vorm die eerste fase, grade 4 tot 7 die tweede fase, en die laaste fase is grade 8 tot 10. Daar word deurgaans vier tipes lesse in elke boek vir alle grade aangebied.

- **Graadles**

'n Graadles is 'n les wat vir die kinders van daardie spesifieke graad geskryf is. Dit is 'n *gewone* les soos ons dit altyd geken het en word op die *gewone* manier aangebied. Die getal lesse wissel van twee tot drie per kwartaal. Waar daar net twee lesse is, is die derde een altyd 'n hersieningsles.

- **Gesinsles**

Vir hierdie les is dit belangrik om te onthou dat gesinne op verskillende maniere saamgestel is. In jou klas kan daar kinders uit 'n tradisionele of normale gesin wees met 'n pa en 'n ma. Daar kan enkelouergesinne wees. Dit is wanneer die kinders vir die meeste van die tyd net by 'n pa of 'n ma woon, of om die beurt een naweek by die pa en een naweek by die ma. Ook oumas en oupas, ooms en tannies en selfs ander familie of vriende kan saam met kinders 'n gesin vorm. In baie gevalle is dit selfs net 'n oupa of 'n ouma, 'n oom of 'n tannie, ensovoorts. Daar is selfs gesinne waar die "ouers" persone van dieselfde geslag is. Die woorde *gesin* en *ouers* word in hierdie boek gebruik vir enige van hierdie soorte "gesinne". Onthou ook dat al die lede van die "gesin" vir 'n kind belangrik is, al bly hulle nie noodwendig in dieselfde huis nie.

'n Gesinsles word een keer per kwartaal aangebied. In die lig hiervan moet ouers daaraan gewoon gemaak word om as deel van die nakoming van hul doopbelofte hierdie deel van die

kategeese saam met hul kinders deur te maak. 'n Gesinsles is altyd so saamgestel en word so aangebied dat die hele gesin daarby betrokke raak. Daar moet gepoog word om ten minste die ouers by so 'n geleentheid te betrek, maar aangesien die kind deel is van 'n gesin, sal dit goed wees as ander lede van die gesin ook die geleentheid kan bywoon, indien moontlik. Die fokus van hierdie lesse val op gesins- en ouer-kind-verhoudings. Die betrokkenheid van gesinne in die hele gemeente-opset word ook hier veronderstel. Omdat die ouers moet weet wanneer hulle die lesse moet bywoon, moet kategete reeds aan die begin van die jaar datums aan die ouers voorsien en hulle kort voor die les weer herinner.

- **Faseles**

Faselesse word vir al die kinders van 'n spesifieke fase aangebied: graad R tot graad 3, of 4 tot 7, of 8 tot 10. Hier val die klem op gemeenskaplike sake wat relevant is vir kinders van daardie ouderdom of fase. Aldrie of alvier kategete van 'n spesifieke fase moet dus seker maak dat roosters nie bots nie en wie verantwoordelik gaan wees vir die aanbieding van daardie les. Ter wille van die samehorigheidsgevoel en dissipline, moet aldrie of alvier kategete teenwoordig wees wanneer die les aangebied word.

'n Slotwoord van my kant af: Mag jy vanjaar met jou betrokkenheid by kinders krag, insig, geloof en verantwoordelikheid van die Here ontvang. *In Christus se voetspore* sit jy deur die leiding van die Heilige Gees as't ware ook jou arms om kindertjies, lê hulle die hande op en seën hulle. So verkry jy 'n eervolle plek in die gemeente, groot sekerheid in jou geloof in Christus Jesus, en sal jy na hierdie lewe deel in die vreugde van jou Here.

Dr Hannes Beukes
Hoofredakteur